

IKA-5 ARALIN

**BAGONG BUHAY
BAGONG
GAWAIN**



Sa Araling Ito'y Pag-aaralan Mo

Paano Mo Ginugugol Ang Iyong Panahon?

Sa Pagbabago Ng Kinawiwilihan Mo

Ang Mga Bagong Hilig Mo

Pagdalo Sa Iglesya

Pagbabasa Ng Biblia

Pananalangin: Kailan Mananalangin

Pananalangin: Paano Mananalangin

Pagsaksi

Pag-awit Sa Panginoon

Pangangaral Ng Ebanghelyo

Pagkakaloob

Pagtulong Sa Paraang Kaya Mo

Pakikibahagi Sa Mga Samahan Sa Iglesya

Napakaraming Gawain?

Paano Mo Ginugol Ang Iyong Panahon?



Di kasi, dapat kang gumugol ng tiyak na dami ng oras bawa't araw sa paggawa, pagkain at pagtulog; nguni't ano ang ginagawa mo sa nalalabing panahon? Ang ginagawa ng tao kapag sila'y may panahon ay batay sa kinawiwilihan niya at ng kanyang pamilya. May mga taong gumagawa sa lahat ng oras, at ang iba'y naglalaro. May dumadalo sa Iglesya at nakikibahagi sa gawain; ang iba'y "walang panahon para riyon."

Marahil ay wala kang sapat na panahon upang magawa ang lahat ng gusto mo, nguni't kahit paano'y may panahon ka para sa mga bagay na kawili-wili sa iyo.

Ang Gagawin Mo

1. Ang mga gawain mo kung may panahon ka'y karaniwang nababatay sa
 - a) pangunahing hilig mo.
 - b) sinasabi ng iba.
 - k) minana mo.

Sagot: 1. a) pangunahing hilig mo.

Sa Pagbabago Ng Kinawiwilihan Mo

Hindi ka na ngayon naglalaro ng mga larong pambata, sapagka't abala ka na sa mga bagay na higit mong kinawiwilihan. Sa pagbabago ng kinawiwilihan mo, nagbabago rin ang iyong gawain.

Magugulat ang dati mong mga kaibigan pagka't hindi ka na mahilig sa “pagaaliw” na kasama nila sa mga bagay na makasasama sa iyong kalusugan at kaluluwa. Hindi nila nauunawaang napasimulan mo na ang isang buhay na may ibayong kagalakan, higit na kapaki-pakinabang, at nakasisiyang mga gawain.

Dapat mo bang balikan pa ang mga bagay na alam mong di-nakasisiya? Tanungin mo ang taong dating kumakain ng mga napupulot sa basurahan at pagkatapos ay naanyayahang kumain araw-araw sa bahay ng isang mayamang kaibigan, kung babalikan pa niya ang basurahan.

Ang Gagawin Mo

2. Nagbago na ba ang mga kinawiwilihan mo mula ng tanggapin mo si Jesus bilang iyong Tagapagligtas? _____
3. Nagbago na ba ang mga gawain mo? _____

Ang Iyong Bagong Hilig

Bilang anak ng Diyos, bago na ang mga hilig mo. Dahil dito'y makikilahok ka sa kilusan ng pangkat at tatanggap ng pananagutan. Gagawin mo pa rin ang dating bagay, tulad ng paggawa, pagkain, pagtulog, at mga gawain sa bahay - nguni't ang tunay mong buhay ay mabubuhos sa mga bagong hilig mo.

Higit sa lahat, kung mahal mo ang isang tao, ibig mong lagi siyang makapiling at malugod. Ngayong mahal mo ang Diyos, nanaisin mong kapiling Siya at sisikapin mong makalulugod sa Kanya ang gawain mo.

Ang Gagawin Mo

4. Ang pangunahing kinawiwilihan ng anak ng Diyos ay
- a) ang pagkakamal ng salapi.
 - b) ang pag-aaliw.
 - k) ang paggugol ng panahon sa piling ng kanyang Ama at ang paggawa ng mga bagay na makalulugod sa Kanya.

Sagot: 4. k) ang paggugol ng panahon sa piling ng kanyang Ama at ang paggawa ng mga bagay na makalulugod sa Kanya.

Kinawiwilihan nating mainam ang ukol sa Kaharian ng Ama na inihahanda Niyang itatag sa lupa. May gawain Siya para sa bawa't isa sa atin. Magkakasama tayong naghanda para sa pagdating ni Jesu-Cristo upang maghari sa lahat ng bansa, paghaharing may katuwiran at kapayapaan.

Ang Gagawin Mo

5. Ano ang nadarama mo sa pagkaalam na inasahan ng Diyos ang iyong tulong upang maihanda ang mga bagay para sa pagbabalik ni Jesus?

- a) kaligayahan dahil sa ganitong karangalan at karapatan.
- b) kalungkutan pagka't kailangan pala akong gumawa para sa Diyos.

6. Kung ang sagot mo sa tanong na 5 ay "a)" pasalamat mo ang Diyos dahil sa karapatang makabahagi sa Kanyang gawain at Kaharian. Kung ang sagot mo'y "b)", ipinapayo nami'y idalangin mo ito.

Sapagka't bago na ang mga kinawiwilihan mo sa Kaharian ng Diyos, magiging abala ka't masaya. Narito ang ilang gawaing magbibigay ng bagong layunin at kahulugan sa iyong buhay.

Pagdalo Sa Iglesya

Nagtatag ng mga iglesya ang pamilya ng Diyos. Ang mga Cristiano sa isang purok ay palagiang nagtitipon upang sumamba sa Diyos, magtulongan sa buhay espirituwal, at ganapin ng mabisa ang iniatang sa kanila ng Dios.

Ang pagtitipong ito, o gawain ng iglesya, ay maaaring idaos sa tahanan o sa isang gusali na inihandog sa Diyos para sa ganitong layunin.

Nanaisin mong dumalong madalas sa mga gawaing ito at magsama ng mga kaibigan upang makarinig ng ebanghelyo. Maiibigan mo ang pakikipagkaisa sa mga kapatid kay Cristo, at higit sa lahat, ang pakikisama ng Panginoon sa panahon ng panambahan.

Nanaisin mong maging kaanib ng isang iglesya sa lalong madaling panahon: isang iglesyang naglilingkod sa Diyos at ipinangangaral ang ebanghelyo. Makibahagi ka sa palatuntunan ng iglesya, at tamasahin mo ang hatid nitong kapakinabangan at pagpapala. Tutulongan ka ng mga araling ito na maging mabuting kaanib.

Ang Gagawin Mo

7. Kung nais mong gumawa nang lalong mabisa para sa Diyos at malasap ang pagpapalang dulot ng pakikipagkaisa sa kapuwa Cristiano, dapat kang

- a) lumayo sa mga nakatatag ng iglesia.
- b) dumalo sa iglesia nguni't huwag maging kaanib.
- k) umanib sa isang mabuting iglesia at makibahagi sa kanyang palatuntunan.

Sagot: 7. k) umanib sa isang mabuting iglesia at **makibahagi** sa kanyang palatuntunan.

Ano ang mangyayari kung balang araw ay may pastor o ibang Cristianong makasakit ng iyong damdamin, bagama't hindi niya sinasadya ang kanyang sinasabi? Kapag may anak na nakasugat ng damdamin ng isa niyang kaanak, hindi naman umaalis ng tahanan ang mga iyon. Nguni't kapag nangyayari ito sa iglesia, may mga Cristianong nagsasabi: "Nasaktan niya ang damdamin ko. Hindi na ako babalik sa iglesyang iyon. Sasamba na lang ako sa Panginoon sa bahay." Kaiingat ka! Ito'y paboritong pandaya ni Satanas upang papanghinain ang isang Cristiano at ihiwalay siya sa Panginoon.

Tandaan, inaasahan ng Ama na makaisa ang Kanyang mga anak sa Kanyang tahanan. Ang gusali'y maaaring aba, at hindi mo nagugustuhan ang lahat ng ginagawa roon; subali't kailangan ka ng makipagkaisa sa mga kapatid kay Cristo at magsalo-salo kayo sa hapag ng Ama upang tumanggap ng pagkaing kailangan ng iyong kaluluwa.

At huwag nating kaligtaan ang pagdalo sa ating mga pagtitipon gaya ng ginagawa ng ilan kundi palakasin ang loob ng isa't isa Hebreo 10:25.

Ang Gagawin Mo

8. Kung may sinabi ang pastor na nakasakit sa damdamin mo

- a) huwag ka nang dumalo sa iglesya.
- b) kumuha ka ng ibang pastor.
- k) patawarin mo siya at patuloy kang dumalo sa gawain sa iglesya.

9. Sauluhin ang Hebreo 10:25.

Sagot: 8. k) patawarin mo siya at patuloy kang dumalo sa gawain sa iglesya.

Pagbabasa Ng Biblia

Binanggit na natin ang kahalagahan ng pagbabasa ng Biblia araw-araw. Magagawa mo bang anyayahan ang iba pang kaanib ng iyong pamilya para sa pagbabasa ng Biblia at pananalangin? Ang tawag dito'y "family altar" o debosyong pampamilya. Magiging tunay na pagpapala ito sa inyong tahanan. Papatnubayan kayo at palalakasin ng Salita ng Diyos. Sa debosyong pampamilya, magkakasama ninyong idinadalangin ang mga problema at pangangailangan ng bawa't kaanib ng pamilya.

Ang Gagawin Mo

10. Ang tawag na “debosyong pampamilya” o “family altar” ay nangangahulugang

- a) isang gawain sa iglesya na dinadaluhan lamang ng mga pamilya.
- b) nagtitipon ang kaanib ng isang pamilya upang manalangin at magbasa ng Biblia sa loob ng tahanan.

Sagot: 10. b) nagtitipon ang kaanib ng isang pamilya upang manalangin at magbasa ng Biblia sa loob ng tahanan.

Panalangin: Kailan Mananalangin

Ang panalangin ay isa sa pinakamahalagang bagay na magagawa ng isang Cristiano. Kapag sinagot ng Diyos ang iyong panalangin, kaisa mo ang Diyos sa paggawa. Kaya't mag-ukol ka ng panahon sa panalangin.

▲ Pagkagising mo, manalangin sa Diyos at magkakaroon ka ng kalakasang pisikal, moral, at espirituwal para ilaban sa mga suliranin sa maghapon.

▲ Pasalamatang ang Diyos dahil sa pagkain bago mo kainin.

- ▲ **Idaos ang debosyong pampamilya sa umaga o kaya'y sa gabi.**
- ▲ **Samantalahin ang mga oras ng panalangin sa panahon ng pagsamba sa iglesya at pagdating mo bago simulan ang pananambahan. Ang wika ng Diyos: "Ang aking bahay ay tatawaging bahay ng panalangin."**
- ▲ **Buksan sa Diyos ang iyong puso anumang oras, pasalamat siya sa Kanyang mga pagpapala, o hingin ang Kanyang tulong. Hindi naman kailangang lagi kang magsasalita kung nananalangin. Alam ng Ama ang iniisip mo.**
- ▲ **Bago ka matulog sa gabi, pasalamat ang Diyos sa ginawa Niyang pag-iingat sa iyo sa maghapon. Ihingi ng tawad ang anumang kasalanang nagawa mo, at ipagkatiwala sa Kanya ang iyong sarili sa buong magdamag.**

Ang Gagawin Mo

11. Lagyan ng pananda ang bawa't panahong iminumungkahi para sa panalangin, kung ginaganap.

Panalangin: Paano Mananalangin

Sasabihin mo marahil: "Hindi ako marunong manalangin." Hindi naman ito mahirap. Kausapin mo ang Diyos na parang nakikipag-usap sa isang kaibigan. Tutulungan ka ng Espiritu Santo.

Isipin ang lahat ng nagawa ng Diyos para sa iyo at pasalamat mo Siya sa marami Niyang pagpapala. Idulog sa Kanya ang pangangailangan mo at ng mga mahal mo sa buhay. Idalangin ang kaligtasan ng iyong mga kaibigan at kamag-anak. Idalangin ang iyong pastor, iglesya, mga kapatid sa Panginoon, at ang gawain ng Diyos sa buong sanlibutan. Idalangin ang mga Cristiano at pati ang kanilang suliranin. Idalangin ang iyong bansa. Simulan mong manalangin at madali mong matututuhan ang paraan.

Nagbigay si Jesus ng isang huwarang maisasaulo mo at magagamit sa iyong panalangin.

Ang Panalangin Ng Panginoon

Ama naming nasa langit, Sambahin nawa ang pangalan mo. Ikaw nawa ang maghari sa amin, sundin nawa ang iyong kalooban dito sa lupa tulad ng sa langit. Bigyan mo kami ng pagkaing kailangan namin sa araw na ito; At patawarin mo kami sa aming mga kasalanan, Tulad rin naman ng aming pagpapatawad sa mga nagkakasala sa amin, at huwag mo kaming iharap sa mahigpit na pagsubok, Kundi iadya mo kami sa masama! (Sapagka't iyo ang kaharian, at ang kapangyarihan at ang kapurihan, magpakailanman. Amen.)
Mateo 6:9-13.

Ang Gagawin Mo

12. Sauluhin ang Panalangin ng Panginoon.

Pagsaksi

Ito'y pagsasabi sa iba ng nagawa ng Diyos para sa iyo. Magagawa mo ito sa tahanan, sa lansangan, sa iglesya, o kahit sa sulat. Kung paano kang kinausap ng iba tungkol kay Cristo gayon sumasaksi ka sa iyong mga kaibigan at kamaganak. Idalangin mong tanggapin din nila ang Panginoon nang hindi sila mapunta sa impiyerno.

Binibigyang-diin ng Biblia ang hayagang pagsasabi ng ating pananalig kay Cristo, upang malaman ng iba na Siya ang ating Tagapagligtas. Sinabi ni Cristo: "Kayo'y magiging saksi ko." Kung kailangan mo ang lakas ng loob, hingin ito sa Diyos at ibibigay sa iyo. Marami ang takot sumaksi, gaya mo marahil ngayon, nguni't naiwaksi nila ito at tumanggap ng malaking pagpapala at panibagong kalakasan sa pagsaksi para kay Cristo. Sinabi ng Panginoong Jesus:

"Ang sinumang kumilala sa akin sa harapan ng mga tao ay kikilalanin ko rin naman sa harapan ng Aking Ama." Mateo 10:32.

"Kapag ang sinuman ay nahiyang kumilala sa akin at sa aking mga salita sa harapan ng lahing ito na makasalanan at hindi tapat sa Diyos, ikahihiya rin siya ng Anak ng Tao, pagparito niya na taglay ang dakilang kapangyarihan ng Kanyang Ama, at kasama ang mga banal na anghel." Marcos 8:38.

Ang Gagawin Mo

13. Nais ng Diyos na ang Kanyang mga anak ay

- a) manahimik tungkol sa ginagawa Niya para sa kanila.
- b) sabihin sa iba ang nagawa Niya para sa kanila.

Sagot: 13. b) sabihin sa iba ang nagawa Niya para sa kanila.

Pag-awit sa Panginoon

Sa tahanan o sa iglesya, ang mga awit mo'y tutulong, magpapasigla, at magpapala sa iyo at sa iba. Kahit na di maganda ang iyong tinig: ang mahalaga ay pinupuri mo ang Diyos sa kaibuturan ng iyong puso.

Umawit kayo ng mga salmo, mga imno, at mga awiting espirituwal, na may pagpapasalamat sa Diyos. Colosas 3:16.

Ang Gagawin Mo

14. Upang makaawit, ang pinakamahalaga'y

- a) magkaroon ng magandang tinig.
- b) umawit siya sa iglesya.
- k) umawit siya sa kaibuturan ng kanyang puso at sa kapurihan ng Diyos.

Sagot: 14. k) umawit siya sa kaibuturan ng kanyang puso at sa kapurihan ng Diyos.

Pangangaral Ng Ebanghelyo

Mahalagang mahalagang gawain ito ng iglesya. May mga tinawag upang mag-ukol ng buong buhay nila sa gawaing ito. Tumanggap sila sa Diyos ng pananagutang maging pastor, ebanghelista, at misyonero.

Pagkakaloob

Ang pangangaral ng Ebanghelyo ay gawain ng buong pamilya ng Diyos, kaya't hinihingi ng Ama sa bawa't anak Niya ang ikasampung bahagi ng kinikita upang makatulong sa gugulin. Ikapu ang tawag dito. Ang salaping ito'y ginagamit sa pambayad sa upa sa mga tanggapan, sa pagpapagawa ng mga gusali ng iglesya, sa pangangailangan ng pastor, upang maiukol niya ang buong panahon sa gawain ng Diyos, at pambayad sa konsumo sa ilaw, tubig, at pagpapakumpuni ng iglesya. Ang kaloob nati'y nakatutulong din upang mapalaganap ang Ebanghelyo sa pamamagitan ng radyo, babasahin, kursong tulad nito, at pagmimisyon sa buong sanlibutan.

Ang Gagawin Mo

15. Ang ikapu'y pagbibigay ng

- a) ikasampung bahagi ng iyong kita para sa Diyos.
- b) ikasampung bahagi ng lahat ng iyong ari-arian para sa Diyos.

----- k) ikaapat na bahagi ng iyong kita para sa Diyos.

Sagot: 15. a) ikasampung bahagi ng iyong kita para sa Diyos.



Ang iyong ikapu at handog ay bahagi ng pagsamba sa Diyos. Ito’y pagsasabi ng “salamat po” dahil sa Kanyang mga pagpapala. Dahil dito, magiging katuwang ka rin Niya sa dakilang gawain ng pagpapalaganap ng Ebanghelyo sa buong sanlibutan.

Binibigyan ka ng Diyos ng lakas upang gumawa, at ang isa lamang ng bawa’t ikasampung araw ang ibinibigay mo sa Kanya. Ang kita mo sa araw na yaon ay makatutulong upang mabuksan ang pinto ng iglesya at maipangaral ang Ebanghelyo. Kaya sa pamamagitan ng iyong ikapu, ipinangangaral mo ang Ebanghelyo.

May tatlong uri ng pagpapalang bunga ng iyong pagkakaloob:

- ▲ Pagpapalang espirituwal.
- ▲ Kasiyahan. Nagagalak ka na maging kaanib na maaasahan ng pamilya ng Diyos na nagdadala ng iyong bahagi sa pasanin.

▲ Kaunlaran. Hindi mo malalampan sa pagbibigay ang Diyos. Pinaunlad yaong nagbabayad ng kanilang ikapu. Libu-libong Cristiano ang makapagsasabi sa iyo kung paano nila naranasan ito.

“Dalhin ninyo ang buong ikasampung bahagi sa kamalig... at subukin ninyo ako ngayon sa bagay na ito, sabi ng Panginoon ng mga hukbo, Kung hindi ko bubuksan sa inyo ang mga dungawan sa langit, at ihuhulog ko sa inyo ang isang pagpapala, na walang sapat na silid na kalalagyan.” Malakias 3:10.

Sapagka't ang ibig ng Diyos ay kusang pagkakaloob. 2 Corinto 9:7.

Ang Gagawin Mo

16. Nangako ang Diyos na pasasaganain yaong

----- a) mag-iimpok ng bawa't baryang maiipon nila

----- b) nagbibigay ng kanilang ikapu.

Sagot: 16. b) nagbibigay ng kanilang ikapu.

Pagtulong Sa Anumang Paraang Kaya Mo

Anuman ang gawin mo para sa Panginoon, ikaw ay espirituwal na lalago: kahit na ang pagwawalis ng iglesya, o pagdaraos ng gawain sa inyong purok, o Paaralang Panglinggo sa inyong

tahanan. Sumangguni sa pastor sa magagawa mo para sa Panginoon.

Ang Gagawin Mo

18. Ang Cristiano'y dapat

- a) mag-alok ng kanyang paglilingkod sa pastor upang makatulong sa anumang paraang kaya niya.
- b) maghintay na hingan ng tulong ng kanyang pastor.

Sagot: 18.a) mag-alok ng kanyang paglilingkod sa pastor upang makatulong sa anumang paraang kaya niya.

Pakikibahagi Sa Mga Samahan Sa Iglesya

Maraming samahan sa iglesya. Ang Paaralang Panglinggo'y para sa lahat. Maaari kang maging kaanib ng isa sa mga klase rito at maayos na mag-aral ng Salita ng Diyos. Huwag kaliligtaan ang pagkakataong ito. May kani-kaniyang samahan ang kalalakihan, kababaihan, kabataan, at mga bata. Sa kanilang pulong ay sumasamba sila sa Panginoon at nagsasagawa ng iba't ibang proyekto para sa Kanya. Sinisikap ng pangkating ito na maabot, maturuan, at matulungan ang nangangailangan nito. Bagama't bahagya lamang ang nagagawa ng isang tao, ang pagkilos ng Diyos sa

magkakasanib sa lakas ng Kanyang mga anak ay magpapasulong sa Kanyang kilusan sa sanlibutang ito.


Ang Gagawin Mo

19. Kaanib ka ba ng alinmang samahan sa iglesya? _____
 Kung hindi, nais mo bang umanib? _____
 Ng aling pangkat? _____

Napakaraming Gawain?

Huwag kang mag-alala kung hindi ka maka-pag-ukol nang panahong kasindami ng maiuukol ng iba. Nauunawaan ito ng Panginoon at tutulongan ka Niyang makagawa ng kaya mo.

Mawiwili ka sa mga gawain ng iyong bagong buhay. Nakasisiyang malaman na tumutulong ka sa iba upang makaiwas sa walang hanggang kaparusahan at masumpungan ang buhay na walang hanggan. At sa lahat ng gagawin mo para sa Panginoon ngayon gagantimpalaan kang sagana sa darating na kaharian.



Ngayong tapos mo na ang unang limang aralin, handa ka na para sagutin ang unang bahagi ng iyong talaan ng mag-aaral. Pagbalik-aralan ang mga Araling 1-5. Sundin ang mga alituntunin sa iyong talaan.